

四庫全書

史部

欽定四庫全書

史部

明史卷三百二十四至
三百六十六

總校官編修臣朱鈐

欽定四庫全書

明史卷三百二十四

大學士張廷玉等奉 敕修

列傳第二百一十二

外國五

占城 寶童龍

真臘

暹羅

爪哇

閩婆
碟里

蘇吉丹
日羅夏治

三佛齊

占城居南海中自瓊州航海順風一晝夜可至自福州西南行十晝夜可至即周越裳地秦為林邑漢為象林縣後漢末區連據其地始稱林邑王自晉至隋仍之唐時或稱占不勞或稱占婆其王所居曰占城至德後改號曰環王迄周宋遂以占城為號朝貢不替元世祖惡其阻命大舉兵擊破之亦不能定洪武二年太祖遣官以即位詔諭其國其王阿荅阿者先已遣使奉表來朝貢象虎方物帝喜即遣官齎璽書大統歷文綺紗羅

偕其使者往賜其王復遣使來貢自後或比歲貢或間
歲或一歲再貢未幾命中書省管勾甘桓會同館副使
路景賢齎詔封阿荅阿者為占城國王賜綵幣四十大
統歷三千三年遣使往祀其山川尋頒科舉詔於其國
初安南與占城構兵天子遣使諭解而安南復相侵四
年具王奉金葉表來朝長尺餘廣五寸刻本國字館人
譯之其意曰大明皇帝登大寶位撫有四海如天地覆
載日月照臨阿荅阿者譬一草木爾欽蒙遣使以金印

封為國王感戴忻悅倍萬恒情惟是安南用兵侵擾疆域殺掠吏民伏願皇帝垂慈賜以兵器及樂器樂人俾安南知我占城乃聲教所被輸貢之地庶不敢欺陵帝命禮部諭之曰占城安南並事朝廷同奉正朔乃擅自構兵毒害生靈既失事君之禮又乖交鄰之道已咨安南國王令即日罷兵本國亦宜講信修睦各保疆土所請兵器於王何吝何兩國互構而賜占城是助爾相攻甚非撫安之義樂器樂人語音殊異難以遣發爾國有

曉華言者其選擇以來當令肄習因命福建省臣勿徵其稅示懷柔之意六年貢使言海寇張汝厚林福等自稱元帥剽劫海上國主擊破之賊魁溺死獲其舟二十艘蘇木七萬斤謹奉獻帝嘉之命給賜加等冬遣使獻安南之捷帝謂省臣曰去冬安南言占城犯境今年占城謂安南擾邊未審曲直可遣人往諭各罷兵息民毋相侵擾十年與安南王陳煊大戰煊敗死十二年貢使至都中書不以時奏帝切責丞相胡惟庸汪廣洋二人

遂獲罪遣官賜王大統歷及衣幣令與安南修好罷兵
十三年遣使賀萬壽節帝聞其與安南水戰不利賜敕
諭曰曩者安南兵出敗於占城占城乘勝入安南安南
之辱已甚王能保境息民則福可長享如必驅兵苦戰
勝負不可知而鷸蚌相持漁人得利他日悔之不亦晚
乎十六年貢象牙二百枝及方物遣官賜以勘合文冊
及織金文綺三十二磁器萬九千十九年遣子寶部領
詩那日忽來朝賀萬壽節獻象五十四皇太子亦有獻

帝嘉其誠賜賚優渥命中官送還明年復貢象五十一
及伽南犀角諸物帝加宴賚還至廣東復命中官宴餞
給道里費真臘貢象占城王奪其四之一其他失德事
甚多帝聞之怒二十一年夏命行人董紹敕責之紹未
至而其貢使抵京尋復遣使謝罪乃命宴賜如制時阿
答阿者失道大臣閣勝懷不軌謀二十三年弑王自立
明年遣太師奉表來貢帝惡其悖逆却之三十年後復
連入貢成祖即位詔諭其國永樂元年其王占巴的賴

奉金葉表朝貢且告安南侵掠請降敕戒諭帝可之遣
行人蔣賓興王樞使其國賜以絨錦織金文綺紗羅明
年以安南王胡查奏詔戢兵遣官諭占城王而王遣使
奏安南不遵詔旨以舟師來侵朝貢人回賜物悉遭奪
掠又畀臣冠服印章俾為臣屬且已據臣沙離牙諸地
更侵掠未已臣恐不能自存乞隸版圖遣官往治帝怒
敕責胡查而賜占城王紗幣四年貢白象方物復告安
南之難帝大發兵往討敕占城嚴兵境上遏其越逸獲

者即送京師五年攻取安南所侵地獲賊黨胡烈潘麻
休等獻俘闕下貢方物謝恩帝嘉其助兵討逆遣中官
王貴通齎敕及銀幣賜之六年鄭和使其國王遣其孫
舍楊該貢象及方物謝恩十年其貢使乞冠帶予之復
命鄭和使其國十三年王師方征陳季擴命占城助兵
尚書陳洽言其王陰懷二心愆期不進反以金帛戰象
資季擴季擴以黎蒼女遺之復約季擴舅陳翁挺侵升
華府所轄四州十一縣地厥罪維均宜遣兵致討帝以

交趾初平不欲勞師但賜敕切責俾還侵地王即遣使
謝罪十六年遣其孫舍那挫來朝命中官林貴行人倪
俊送歸有賜宣德元年行人黃原昌往頒正朔繩其王
不恪卻所酬金幣以歸擢戶部員外郎正統元年瓊州
知府程瑩言占城比年一貢勞費實多乞如暹羅諸國
例三年一貢帝是之敕其使如瑩言賜王及妃綵幣然
番人利中國市易雖有此令迄不遵六年王占巴的賴
卒其孫摩訶賁該以遺命遣王孫述提昆來朝貢且乞

嗣位乃遣給事中舒瞻行人吳惠齋詔封為王新王及妃並有賜七年春述提昆卒於途帝憫之遣官賜祭八年遣從子且揚樂催貢舞牌旗黑象十一年敕諭摩訶賁該曰邇者安南王黎濬遣使奏王欺其孤幼曩已侵升華思義四州今又屢攻化州掠其人畜財物二國俱受朝命各有分疆豈可興兵構怨乖睦隣保境之義王宜祇循禮分嚴飭邊臣毋恣肆侵軼貽禍生靈并諭安南嚴行備禦毋挾私報復先是定三年一貢之例其國

不遵及詰其使者則云先王已逝前敕無存故不知此
令是歲貢使復至再敕王遵制賜王及妃綵幣冬復遣
使來貢十二年王與安南戰大敗被執故王占巴的賴
姪摩訶貴來遣使奏先王抱疾曾以臣為世子欲令嗣
位臣時年方幼弱遜位於舅氏摩訶貴該後屢興兵伐
安南致敵兵入舊州古壘等處殺掠人畜殆盡王亦被
禽國人以臣先王之姪且有遺命請臣代位辭之再三
不得已始於府前治事臣不敢自專伏候朝命乃遣給

事中陳誼行人薛幹封為王諭以保國交鄰并諭國中
臣民共相輔翼十三年敕安南送摩訶賁該還國不奉
命景泰三年遣使來貢且告王訃命給事中潘本愚行
人邊永封其弟摩訶賁由為王天順元年入貢賜其正
副使銀花金帶二年王摩訶槃羅悅新立遣使奉表朝
貢四年復貢自正使以下賜紗帽及金銀角帶有差使
者訴安南見侵因敕諭安南王九月使來告王喪命給
事中黃汝霖行人劉恕封王弟槃羅茶全為王八年入

貢憲宗嗣位應頒賜蕃國錦幣禮官請付使臣齎回從之使者復訴安南見侵求索白象乞如永樂時遣官安撫建立界牌石以杜侵陵兵部以兩國方爭不便遣使乞令使臣歸諭國王務循禮法固封疆捍外侮毋輕構禍從之成化五年入貢時安南索占城犀象寶貨令以事天朝之禮事之占城不從大舉往伐七年破其國執王槃羅茶全及家屬五十餘人劫印符大肆焚掠遂據其地王弟槃羅茶悅逃山中遣使告難兵部言安南吞

并與國若不為處分非惟失占城歸附之心抑恐啓安
南跋扈之志宜遣官齎敕宣諭還其國王及眷屬帝慮
安南逆命令俟貢使至日賜敕責之八年以槃羅茶悅
請封命給事中陳峻行人李珣持節往峻等至新州港
守者拒之知其國已為安南所據改為交南州乃不敢
入十年冬還朝安南既破占城復遣兵執槃羅茶悅立
前王孫齋亞麻弗菴為王以國南邊地予之十四年遣
使朝貢請封命給事中馮義行人張瑾往封之義等多

攜私物既至廣東聞齋亞麻弗菴已死其弟古來遣使
乞封義等慮空還失利亟至占城占城人言王孫請封
之後即為古來所殺安南以偽敕立其國人提婆苔為
王義等不俟奏報輒以印幣授提婆苔封之得所賂黃
金百餘兩又往滿刺加國盡貨其私物以歸義至海洋
病死瑾具其事并上偽敕於朝十七年古來遣使朝貢
言安南破臣國時故王弟槃羅茶悅逃居佛靈山比天
使齋封誥至已為賊人執去臣與兄齋亞麻弗菴潛竄

山谷後賊人畏懼天威遣人訪覓臣兄還以故地然自
邦都郎至真臘止五處臣兄權國未幾遽爾隕歿臣當
嗣立不敢自專仰望天恩賜之冊印臣國所有土地本
二十七處四府一州二十二縣東至海南至真臘西至
黎人山北至阿本喇補凡三千五百餘里乞特諭交人
盡還本國章下廷議英國公張懋等請特遣近臣有威
望者二人往使時安南貢使方歸即賜敕詰責黎瀨令
速還地毋抗朝命禮官乃劾瑾擅封執下詔獄具得其

情論死時古來所遣使臣在館召問之云古來實王弟其王病死非弑提婆苔不知何人乃命使臣暫歸廣東俟提婆苔使至審誠偽處之使臣候命經年提婆苔使者不至乃令還國二十年敕古來撫諭提婆苔使納原降國王印宥其受偽封之罪仍為頭目提婆苔不受命乃遣給事中李孟暘行人葉應冊封古來為國王孟暘等言占城險遠安南構兵未已提婆苔又竊據其地稍或不慎反損國威宜令來使傳諭古來詣廣東受封并

敕安南悔禍從之古來乃自老撾黎家赴崖州孟暘竣
封事而返古來又欲躬詣闕廷奏安南之罪二十三年
總督宋旻以聞廷議遣大臣一人往勞檄安南存亡繼
絕迎古來返占城帝報可命南京右都御史屠瀟往至
廣東即傳檄安南宣示禍福募健卒二千人駕海舟二
十艘護古來還國安南以瀟大臣奉特遣不敢抗古來
乃得入明年弘治改元遣使入貢二年遣弟卜古良赴
廣東言安南仍肆侵陵乞如永樂時遣將督兵守護總

督秦紘等以聞兵部言安南占城皆祖訓所載不征之國永樂間命將出師乃正黎賊弑逆之罪非以隣境交惡之故今黎灝修貢惟謹古來膚受之愬容有過情不可信其單詞勞師不征之國宜令守臣回咨言近交人殺害王子古蘇麻王即率衆敗之仇恥已雪王宜自強修政撫卹國人保固疆圉仍與安南敦睦修好其餘嫌細故悉宜捐除倘不能自強專藉朝廷發兵渡海代王守國古無是理帝如其言三年遣使謝恩其國自殘破

後民物蕭條貢使漸稀十二年遣使奏本國新州港之地仍為安南侵奪患方未息臣年已老請及臣未死命長子沙古卜洛襲封庶他日可保國土廷議安南為占城患已非一日朝廷嘗因占城之愆累降璽書曲垂誨諭安南前後奏報皆言祇承朝命土地人民悉已退還然安南辨釋之語方至而占城控訴之詞又聞恐真有不獲已之情宜仍令守臣切諭安南毋貪人土地自貽禍殃否則議遣偏師往問其罪至占城王長子無父在

襲封之理請令先立為世子攝國事俟他日當襲位時
如例請封帝報允尋遣王孫沙不登古魯來貢十八年
古來卒子沙古卜洛遣使來貢不告父喪但乞命大臣
往其國仍以新州港諸地封之別有占奪方輿之奏微
及父卒事給事中任良弼等言占城前因國土削弱假
貢乞封仰仗天威讐伏隣國其實國王之立不立不係
朝廷之封不封也今稱古來已歿虛實難知萬一我使
至彼古來尚存將遂封其子乎抑義不可而已乎迫脅

之間事極難處如往時科臣林霄之使滿刺加不肯北
面屈膝幽餓而死迄不能問其罪君命國威不可不慎
大都海外諸蕃無事則廢朝貢而自立有事則假朝貢
而請封今者貢使之來豈急於求封不過欲復安南之
侵地還粵東之逃人耳夫安南侵地璽書屢諭歸還占
據如故今若再諭彼將玩視之大威褻矣倘我使往封
占城羈留不遣求為處分朝廷將何以應又或拘我使
者令索逃人是以天朝之貴臣質於海外之蠻邦宜如

往年古來就封廣東事令其領敕歸國於計為便禮部亦以古來存亡未明請令廣東守臣移文占城勘報從之既而封事久不行正德五年沙古卜洛遣叔父沙係把麻入貢因請封命給事中李貫行人劉文瑞往貫抵廣東憚行請如古來故事令其使臣領封廷議遣官已二年今若中止非興滅繼絕義倘其使不願領封或領歸而受非其人重起事端益傷國體宜令貫等亟往貫終憚行以乏通事火長為詞廷議令廣東守臣采

訪其人如終不得則如舊例行貫復設詞言臣奉命五載似憚風波之險殊不知占城自古來被逐後竄居赤坎邦都郎國非舊疆勢不可往況古來乃前王齋亞麻弗菴之頭目殺王而奪其位王有三子其一尚存義又不可律以春秋之法雖不興問罪之師亦必絕朝貢之使奈何又為采訪之議徒延歲月於事無益廣東巡按丁楷亦附會具奏廷議從之十年令其使臣齋敕往自是遂為故事其國貢使亦不常至嘉靖二十二年遣王

叔沙不登古魯來貢訴數為安南侵擾道阻難歸乞遣
官護送還國報可其國無霜雪四時皆似夏草木常青
民以漁為業無二麥力穡者少故收穫薄國人皆食檳
榔終日不離口不解朔望但以月生為初月晦為盡不
置閏分晝夜為十更非日中不起非夜分不卧見月則
飲酒歌舞為樂無紙筆用羊皮槌薄熏黑削細竹蘸白
灰為字狀若蚯蚓有城郭甲兵人性狠而狡貿易多不
平戶皆北向民居悉覆茅檐高不得過三尺部領分差

等門高卑亦有限飲食穢污魚非腐爛不食釀不生蛆
不為美人體黑男蓬頭女椎結俱跣足王鎖里人崇釋
教歲時采生人膽入酒中與家人同飲且以浴身曰通
身是膽其國人采以獻王又以洗象目每伺人於道出
不意急殺之取膽以去若其人驚覺則膽已先裂不足
用矣置衆膽於器華人膽輒居上故尤貴之五六月間
商人出必戒備王在位三十年則避位入深山以兄弟
子姪代而已持齋受戒告於天曰我為君無道願狼虎

食我或病死居一年無恙則復位如初國中呼為昔嚟馬哈刺乃至尊至聖之稱也國不甚富惟犀象最多烏木降香樵以為薪加南香獨產其地一山酋長遣人守之民不得采犯者至斷手有鰐魚潭獄疑不決者令兩造騎牛過其旁曲者魚輒躍而食之直者即數往返不食也有尸頭蠻者一名屍致魚本嬭人惟無瞳神為異夜中與人同寢忽飛頭食人穢物來即復活若人知而封其頸或移之他所其嬭即死國設厲禁有而不告者

罪及一家

賓童龍國與占城接壤或言如來入舍衛國乞食即其地氣候草木人物風土大類占城惟遭喪能持服葬以僻地設齋禮佛婚姻偶合苗出入乘象或馬從者百餘人前後讚唱民編茅覆屋貨用金銀花布有崑崙山節然大海中與占城及東西竺鼎峙相望其山方廣而高其海即曰崑崙洋諸往西洋者必待順風七晝夜始得過故舟人為之諺曰上怕七州下怕崑崙針迷舵失人

船莫存此山無異產人皆穴居巢處食果實魚蝦無室
廬井竈

真臘在占城南順風三晝夜可至隋唐及宋皆朝貢宋
慶元中滅占城而并其地因改國名曰占臘元時仍稱
真臘洪武三年遣使臣郭徵等齎詔撫諭其國四年其
國巴山王忽爾那遣使進表貢方物賀明年正旦詔賜
大統歷及綵幣使者亦給賜有差六年進貢十三年王
參答甘武者持達志遣使來貢宴賜如前十三年復貢

十六年遣使齎勘合文冊賜其王凡國中使至勘合不符者即屬矯偽許繫縛以聞復遣使賜織金文綺三十
二磁器萬九千其王遣使來貢十九年遣行人劉敏唐
敬偕中官齎磁器往賜明年敬等還王遣使貢象五十
九香六萬斤尋遣使賜其王鍍金銀印王及妃皆有賜
其王參烈寶毘邪甘菩者遣使貢象及方物明年復貢
象二十八象奴三十四人番奴四十五人謝賜印之恩
二十二年三貢明年復貢永樂元年遣行人蔣賓興王

樞以即位詔諭其國明年王參烈婆毘牙遣使來朝貢
方物初中官使真臘有部卒三人潛遁索之不得王以
其國三人代之至是引見帝曰華人自逃於彼何預而
責償且語言不通風土不習吾焉用之命賜衣服及道
里費遣還三年遣使來貢告故王之喪命鴻臚序班王
致致祭給事中畢進中官王琮齎詔封其嗣子參烈昭
平牙為王進等還嗣王遣使偕來謝恩六年十二年再
入貢使者以其國數被占城侵擾久留不去帝遣中官

送之還并敕占城王罷兵修好十五年十七年並入貢
宣德景泰中亦遣使入貢自後不常至其國城隍周七
十餘里幅員廣數千里國中有金塢金橋殿宇三十餘
所王歲時一會羅列玉猿孔雀白象犀牛於前名曰百
塢洲盛食以金盤金椀故有富貴真臘之諺民俗富饒
天時常熱不識霜雪禾一歲數稔男女椎結穿短衫圍
梢布刑有劓刖刺配盜則去手足番人殺唐人罪死唐
人殺番人則罰金無金則鬻身贖罪唐人者諸番呼華

人之稱也凡海外諸國盡然婚嫁兩家俱八日不出門
晝夜燃燈人死置於野任鳥爲食俄頃食盡者謂爲福
報居喪但髡其髮女子額上剪髮如錢大曰用此報
親文字以麕鹿雜皮染黑用粉爲小條畫於上永不脫
落以十月爲歲首閏悉用九月夜分四更亦有曉天文
者能算日月薄蝕其地謂儒爲班詰僧爲苧姑道爲八
思班詰不知讀何書由此入仕者爲華貫先時項掛一
白線以自別既貴曳白如故俗尚釋教僧皆食魚肉或

以供佛惟不飲酒其國自稱甘孛智後訛為甘破蔗萬
歷後又改為東埔寨

暹羅在占城西南順風十晝夜可至即隋唐赤土國後
分為羅斛暹二國暹土瘠不宜稼羅斛地平衍種多穫
暹仰給焉元時暹常入貢其後羅斛強併有暹地遂稱
暹羅斛國洪武三年命使臣呂宗俊等齎詔諭其國四
年其王參烈昭毘牙遣使奉表與宗俊等偕來貢馴象
六足龜及方物詔賜其王錦綺及使者幣帛有差已復

遣使賀明年正旦詔賜大統歷及綵幣五年貢黑熊白
猿及方物明年復來貢其王之姊參烈思寧別遣使進
金葉表貢方物於宮中却之已而其姊復遣使來貢帝
仍却之而宴賚其使時其王懦而不武國人推其伯父
參烈寶昆邪噠哩哆囉祿主國事遣使來告貢方物宴
賚如制已而新王遣使來貢謝恩其使者亦有獻帝不
納已遣使賀明年正旦貢方物且獻本國地圖七年使
臣沙里拔來貢言去年舟次烏猪洋遭風壞舟飄至海

南賴官司救護尚存飄餘兜羅綿降香蘇木諸物進獻
廣東省臣以聞帝怪其無表既言舟覆而方物乃有存
者疑其為番商命却之諭中書及禮部臣曰古諸侯於
天子比年一小聘三年一大聘九州之外則每世一朝
所貢方物表誠敬而已惟高麗頗知禮樂故令三年一
貢他遠國如占城安南西洋瑣里瓜哇淳泥三佛齊暹
羅斛真臘諸國入貢既頻勞費太甚今不必復爾其移
牒諸國俾知之然而來者不止其世子蘇門邦王昭祿

羣膺亦遣使上箋於皇太子貢方物命引其使朝東宮
宴賚遣之八年再入貢其舊明臺王世子昭孛羅局亦
遣使奉表朝貢宴賚如王使十年昭祿羣膺承其父命
來朝帝喜命禮部員外郎王恒等齎詔及印賜之文曰
暹羅國王之印并賜世子衣幣及道里費自是其國遵
朝命始稱暹羅比年一貢或一年兩貢至正統後或數
年一貢云十六年賜勘合文冊及文綺磁器與真臘等
二十年貢胡椒一萬斤蘇木一萬斤帝遣官厚報之時

溫州民有市其沈香諸物者所司坐以通番當棄市帝
曰溫州乃暹羅必經之地因其往來而市之非通番也
乃獲宥二十一年貢象三十番奴六十二十二年世子
昭祿羣膺遣使來貢二十三年貢蘇木胡椒降香十七
萬斤二十八年昭祿羣膺遣使朝貢且告父喪命中官
趙達等往祭教世子嗣王位賜賚有加諭曰朕自即位
以來命使出疆周於四維足履其境者三十六聲同於
耳者三十一風殊俗異大國十有八小國百四十九較

之於今暹羅最近邇者使至知爾先王已逝王紹先王之緒有道於邦家臣民懽懽茲特遣人錫命王其罔失法度罔淫於樂以光前烈欽哉成祖即位詔諭其國永樂元年賜其王昭祿羣膺哆囉諦刺駝鈕鍍金銀印其王即遣使謝恩六月以上高皇帝尊諡遣官頒詔有賜八月復命給事中王哲行人成務賜其王錦綺九月命中官李興等齎敕勞賜其王其文武諸臣並有賜二年有番船飄至福建海岸詰之乃暹羅與琉球通好者所

司籍其貨以聞帝曰二國修好乃甚美事不幸遭風正
宜憐惜豈可因以為利所司治其舟給粟俟風便遣赴
琉球是月其王以帝降璽書勞賜遣使來謝貢方物賜
賚有加并賜列女傳百冊使者請頒量衡為國永式從
之先是占城貢使返風飄其舟至彭亨暹羅索取其使
羈留不遣蘇門答刺及滿刺加又訴暹羅恃強發兵奪
天朝所賜印誥帝降敕責之曰占城蘇門答刺滿刺加
與爾俱受朝命安得逞威拘其貢使奪其誥印天有顯

道福善禍淫安南黎賊可為鑒戒其即返占城使者還
蘇門答刺滿刺加印誥自今奉法循理保境睦隣庶永
享太平之福時暹羅所遣貢使失風飄至安南盡為黎
賊所殺止餘字黑一人後官軍征安南獲之以歸帝憫
之六年八月命中官張原送還國賜王幣帛令厚恤被
殺者之家九月中官鄭和使其國其王遣使貢方物謝
前罪七年使來祭仁孝皇后命中官告之几筵時奸民
何八觀等逃入暹羅帝命使者還告其主母納逋逃其

王即奉命遣使貢馬及方物并送八觀等還命張原齋
敕幣獎之十年命中官洪保等往賜幣十四年王子三
賴波羅摩刺劄的賴遣使告父之喪命中官郭文往祭
別遣官齋詔封其子為王賜以素錦素羅隨遣使謝恩
十七年命中官楊敏等護歸以暹羅侵滿刺加遣使責
令輯睦王復遣使謝罪宣德八年王悉里麻哈賴遣使
朝貢初其國陪臣柰三鐸等貢舟次占城新州港盡為
其國人所掠正統元年柰三鐸潛附小舟來京訴占城

劫掠狀帝命召占城使者與相質使者無以對乃敕占城王令盡還所掠人物已占城移咨禮部言本國前歲遣使往須文達那亦為暹羅賊人掠去必暹羅先還所掠本國不敢不還三年暹羅貢使又至賜敕曉以此意令亟還占城人物十一年王思利波羅麻那惹智刺遣使入貢景泰四年命給事中劉洙行人劉泰祭其故王波羅摩刺劄的賴封其嗣子把羅蘭米孫刺為王天順元年賜其貢使釵花金帶六年王宇刺藍羅者直波智

遣使朝貢成化九年貢使言天順元年所頒勘合為蟲
所蝕乞改給從之十七年貢使還至中途竊買子女且
多載私鹽命遣官戒諭諸番先是汀州人謝文彬以販
鹽下海飄入其國仕至坤岳猶天朝學士也後充使來
朝貿易禁物事覺下吏十八年遣使朝貢且告父喪命
給事中林霄行人姚隆往封其子國隆勅刺略坤息刺
死地為王弘治十年入貢時四夷館無暹羅譯字官閣
臣徐溥等請移牒廣東訪取能通彼國言語文字者赴

京備用從之正德四年暹羅船有飄至廣東者市舶中
官熊宣與守臣議稅其物供軍需事聞詔斥宣妄攬事
柄撤還南京十年進金葉表朝貢館中無識其字者閣
臣梁儲等請選留其使一二人入館肄習報可嘉靖元
年暹羅占城貨船至廣東市舶中官牛榮縱家人私市
論死如律三十二年遣使貢白象及方物象死於途使
者以珠寶飾其牙盛以金盤并尾來獻帝嘉其意厚遣
之隆慶中其隣國東蠻牛求婚不得慙怒大發兵攻破

其國王自經擄其世子及天朝所賜印以歸次子嗣位
奉表請印予之自是為東蠻牛所制嗣王勵志復仇萬
歷間敵兵復至王整兵奮擊大破之殺其子餘衆宵遁
暹羅由是雄海上移兵攻破真臘降其王從此歲歲用
兵遂霸諸國六年遣使入貢二十年日本破朝鮮暹羅
請潛師直擣日本牽其後中樞石星議從之兩廣督臣
蕭彥持不可乃已其後奉貢不替崇禎十六年猶入貢
其國周千里風俗勁悍習於水戰大將用聖鐵裹身刀

矢不能入聖鐵者人腦骨也王瑣里人官分十等自王至庶民有事皆決於其婦其婦人志量實出男子上婦私華人則夫置酒同飲恬不為怪曰我婦美而為華人所悅也崇信釋教男女多為僧尼亦居菴寺持齋受戒衣服頗類中國富貴者尤敬佛百金之產即以其半施之氣候不正或寒或熱地卑濕人皆樓居男女椎結以白布裹首富貴者死用水銀灌其口而葬之貧者則移置海濱即有羣鴉飛啄俄頃而盡家人拾其骨號泣而

棄之於海謂之鳥葬亦延僧設齋禮佛交易用海貳是
年不用貳則國必大疫其貢物有象象牙犀角孔雀尾
翠羽龜筒六足龜寶石珊瑚片腦米腦糠腦腦油腦柴
薔薇水碗石丁皮阿魏紫梗藤竭藤黃硫黃沒藥烏爹
泥安息香羅斛香速香檀香黃熟香降真香乳香樹香
木香丁香烏香胡椒蘇木肉荳蔻白荳蔻華茛烏木大
風子及撒哈刺西洋諸布其國有三寶廟祀中官鄭和
爪哇在占城西南元世祖時遣使臣孟珙往黥其面世

祖大舉兵伐之破其國而還洪武二年太祖遣使以即位詔諭其國其使臣先奉貢於元還至福建而元亡因入居京師太祖復遣使送之還且賜以大統歷三年以平定沙漠頒詔曰自古為天下王者視天地所覆載日月所照臨若遠若近生人之類莫不欲其安土而樂生然必中國安而後四方萬國順附邇元君托歡特穆爾荒淫昏弱志不在民天下英雄分裂疆宇朕憫生民之塗炭興舉義兵攘除亂畧天下軍民共尊朕居帝位國

號大明建元洪武前年克取元都四方底定占城安南
高麗諸國俱來朝貢今年遣將北征始知元君已沒獲
其孫邁迪哩巴拉封為崇禮侯朕倣前代帝王治理天
下惟欲中外人民各安其所又慮諸蕃僻在遠方未悉
朕意故遣使者往諭咸使聞知九月其王昔里八達刺
蒲遣使奉金葉表來朝貢方物宴賚如禮五年又遣使
隨朝使常克敬來貢上元所授宣敕三道八年又貢十
年王八達那巴那務遣使朝貢其國又有東西二王東

蕃王勿院勞網結西蕃王勿勞波務各遣使朝貢天子以其禮意不誠詔留其使已而釋還之十二年王八達那巴那務遣使朝貢明年又貢時遣使賜三佛齊王印綬瓜哇誘而殺之天子怒留其使月餘將加罪已遣還賜敕責之十四年遣使貢黑奴三百人及他方物明年又貢黑奴男女百人大珠八顆胡椒七萬五千斤二十年再貢明年又貢成祖即位詔諭其國永樂元年又遣副使聞良輔行人甯善賜其王絨錦織金文綺紗羅

使者既行其西王都馬板遣使入賀復命中官馬彬等
賜以鍍金銀印西王遣使謝賜印貢方物而東王字令
達哈亦遣使朝貢請印命遣官賜之自後二王並貢三
年遣中官鄭和使其國明年西王與東王構兵東王戰
敗國被滅適朝使經東王地部卒入市西王國人殺之
凡百七十人西王懼遣使謝罪帝賜敕切責之命輸黃
金六萬兩以贖六年再遣鄭和使其國西王獻黃金萬
兩禮官以輸數不足請下其使於獄帝曰朕於遠人欲

其畏罪而已寧利其金耶悉捐之自後比年一貢或間歲一貢或一歲數貢中官吳賓鄭和先後使其國時舊港地有為瓜哇侵據者滿刺加國王矯朝命索之帝乃賜敕曰前中官尹慶還言王恭待敕使有加無替比聞滿刺加國索舊港之地王甚疑懼朕推誠待人若果許之必有敕諭王何疑焉小人浮詞慎勿輕聽十三年其王改名揚惟西沙遣使謝恩貢方物時朝使所攜卒有遭風飄至班卒兒國者瓜哇人珍班聞之用金贖還歸

之王所十六年王遣使朝貢因送還諸卒帝嘉之賜敕
獎王并優賜珍班自是朝貢使臣大率每歲一至正統
元年使臣馬用良言先任八諦來朝蒙恩賜銀帶今為
亞烈秩四品乞賜金帶從之閏六月遣古里蘇門答刺
錫蘭山柯枝天方加異勒阿丹忽魯謨斯祖法兒甘巴
里真臘使臣偕瓜哇使臣郭信等同往賜瓜哇敕曰王
自我先朝修職勿怠朕今嗣服復遣使來朝意誠具悉
宣德時有古里等十一國來貢今因王使者歸令諸使

同往王其加意撫卹分遣還國副朕懷遠之忱五年使臣回遭風溺死五十六人存者八十三人仍返廣東命所司廩給俟便舟附歸八年廣東參政張瑄言瓜哇朝貢頻數供億費煩敝中國以事遠人非計帝納之其使還賜敕曰海外諸邦並三年一貢王亦宜體恤軍民一遵此制十一年復三貢後乃漸稀景泰三年王巴剌武遣使朝貢天順四年王都馬班遣使入貢使者還至安慶酹酒與入貢番僧鬪僧死者六人禮官請治伴送行

人罪使者敕國王自治從之成化元年入貢弘治十二年貢使遭風舟壞止通事一舟達廣東禮官請敕所司量予賜賚遣還其貢物仍進京師制可自是貢使鮮有至者其國近占城二十晝夜可至元師西征以至元二十九年十二月發泉州明年正月即抵其國相去止月餘宣德七年入貢表書一千三百七十六年蓋漢宣帝元康元年乃其建國之始也地廣人稠性兇悍男子無少長貴賤皆佩刀稍忤輒相賊故其甲兵為諸蕃之最

字類瑣里無紙筆刻於茭葦葉氣候常似夏稻歲二稔
無几榻七箸人有三種華人流寓者服食鮮華他國賈
人居久者亦尚雅潔其本國人最污穢好啖蛇蟻虫蚓
與犬同寢食狀黝黑獠頭赤脚崇信鬼道殺人者避之
三日即免罪父母死舁至野縱犬食之不盡則大戚燔
其餘妻妾多燔以殉其國一名蒲家龍又曰下港曰順
塔萬歷時紅毛番築土庫於大澗東佛郎機築於大澗
西歲歲互市中國商旅亦往來不絕其國有新村最號

饒富中華及諸番商舶輻輳其地寶貨填溢其村主即
廣東人永樂九年自遣使表貢方物

閩婆古曰閩婆達宋元嘉時始朝中國唐曰訶陵又曰
社婆其王居閩婆城宋曰閩婆皆入貢洪武十一年其
王摩那駝喃遣使奉表貢方物其後不復至或曰瓜哇
即閩婆然元史瓜哇傳不言且曰其風俗物產無所考
太祖時兩國並時入貢其王之名不同或本為二國其
後為瓜哇所滅然不可考

蘇吉丹瓜哇屬國後訛為思吉港國在山中止數聚落
酋居吉力石其水滴舟不可泊商船俱往饒洞其地平
衍國人皆就此貿易其與國有思魯瓦及猪蠻猪蠻多
盜華人鮮至

磔里近瓜哇永樂三年遣使附其使臣來貢其地尚釋
教俗淳少訟物產甚薄

日羅夏治近瓜哇永樂三年遣使附其使臣入貢國小
知種藝無盜賊亦尚釋教所產止蘇木胡椒

三佛齊古名干陀利劉宋孝武帝時常遣使奉貢梁武帝時數至宋名三佛齊修貢不絕洪武三年太祖遣行人趙述詔諭其國明年其王馬哈刺札八刺卜遣使奉金葉表隨入貢黑熊火雞孔雀五色鸚鵡諸香苾布兜羅被諸物詔賜大統歷及錦綺有差戶部言其貨舶至泉州宜徵稅命勿徵六年王怛麻沙那阿者遣使朝貢又一表賀明年正旦時其國有三王七年王麻那哈寶林邦遣使來貢八年正月復貢九月王僧伽烈字蘭遣

使隨招諭拂菻國朝使入貢九年怛麻沙那阿者卒子
麻那者巫里嗣明年遣使貢犀牛黑熊火雞白猴紅綠
鸚鵡龜筒及丁香米腦諸物使者言嗣子不敢擅立請
命於朝天子嘉其義命使臣齎印敕封為三佛齊國王
時瓜哇強已威服三佛齊而役屬之聞天朝封為國王
與已埒則大怒遣人誘朝使邀殺之天子亦不能問罪
其國益衰貢使遂絕三十年禮官以諸蕃久缺貢奏聞
帝曰洪武初諸蕃貢使不絕邇者安南占城真臘暹羅

瓜哇大琉球三佛齊淳泥彭亨等花蘇門答刺西洋等
三十國以胡惟庸作亂三佛齊乃生間諜給我使臣至
彼瓜哇王聞知遣人戒飭禮送還朝由是商旅阻遏諸
國之意不通惟安南占城真臘暹羅大琉球朝貢如故
大琉球且遣子弟入學凡諸番國使臣來者皆以禮待
之我視諸國不薄未知諸國心若何今欲遣使瓜哇恐
三佛齊中途沮之聞三佛齊本瓜哇屬國可述朕意移
咨暹羅俾轉達瓜哇於是部臣移牒曰自有天地以來

即有君臣上下之分中國四裔之防我朝混一之初海外諸蕃莫不來享豈意胡惟庸謀亂三佛齊遂生異心給我信使肆行巧詐我聖天子一以仁義待諸蕃何諸蕃敢背大恩失君臣之禮倘天子震怒遣一偏將將十萬之師恭行天罰易如覆手爾諸蕃何不思之甚我聖天子嘗曰安南占城真臘暹羅大琉球皆修臣職惟三佛齊梗我聲教彼以最爾之國敢倔强不服自取滅亡爾暹羅恪守臣節天朝眷禮有加可轉達瓜哇令以大

義告諭三佛齊誠能省愆從善則禮待如初時瓜哇已破三佛齊據其國改其名曰舊港三佛齊遂亡國中大亂瓜哇亦不能盡有其地華人流寓者往往起而據之有梁道明者廣州南海縣人久居其國閩粵軍民泛海從之者數千家推道明為首雄視一方會指揮孫鉉使海外遇其子挾與俱來永樂三年成祖以行人譚勝受與道明同邑命偕千戶楊信等齎敕招之道明及其黨鄭伯可隨入朝貢方物受賜而還四年舊港頭目陳祖

義遣子士良道明遣從子觀政並來朝祖義亦廣東人
雖朝貢而為盜海上貢使往來者苦之五年鄭和自西
洋還遣人招諭之祖義詐降潛謀邀劫有施進卿者告
於和祖義來襲被禽獻於朝伏誅時進卿適遣壻邱彥
誠朝貢命設舊港宣慰司以進卿為使錫誥印及冠帶
自是屢入貢然進卿雖受朝命猶服屬瓜哇其地狹小
非故時三佛齊比也二十二年進卿子濟孫告父計乞
嗣職許之洪熙元年遣使入貢訴舊印為火燬帝命重

給其後朝貢漸稀嘉靖末廣東大盜張璉作亂官軍已
報克獲萬歷五年商人詣舊港者見璉列肆為蕃舶長
漳泉人多附之猶中國市舶官云其地為諸蕃要會在
瓜哇之西順風八晝夜可至轄十五洲土沃宜稼語云
一年種穀三年生金言收穫盛而貿金多也俗富好淫
習於水戰隣國畏之地多水惟部領陸居庶民皆水居
編筏築室繫之於椿水漲則筏浮無沈溺患欲徙則拔
椿去之不費財力下稱其上曰詹卑猶國君也後大酋

所居即號詹卑國改故都為舊港初本富饒自瓜哇破
滅後漸致蕭索商舶鮮至其他風俗物產具詳宋史

明史卷三百二十四

欽定四庫全書

明史卷三百二十四考證

占城傳至德後改號曰環王

臣章宗瀛按新唐書至

德後改號環王目錄中亦作環王則竟以環王為國號矣此處脫去一字謹據增入

占城傳十二年貢使至都

臣章宗瀛按八年上

以占城與爪哇諸國貢使每至中國為商多行謫詐詔禁阻之見麗從簡殊域周咨錄謹附考

占城傳四年貢白象方物復告安南之難

臣章宗瀛

按四年勅廣東都指揮司選精兵六百由海道往占城會兵伐安南又遣中官馬彬賫敕賜鍍金銀印及金銀文綺等物占城既出兵又遣中官王貴通往勞賜鈔幣見明實錄及殊域周咨錄謹附考

占城傳乃遣給事中舒瞳 舊本舒瞳誤管瞳

臣章

宗瀛按殊域周咨錄正使給事中舒某失其名獻徵錄吳惠傳云偕給事中餘姚舒某則傳所云管瞳者

誤也題名錄宣德八年進士舒瞳為餘姚人與獻徵錄所云餘姚舒某其地其名確然相合而字書並無瞳字應為瞳字之誤謹據改

占城傳臣時年幼懦弱遜位於摩訶賁該

臣

章宗瀛

按賁來為占巴的賴之姪賁該為占巴的賴之姪則賁來不應以賁該為舅氏傳內自相矛盾今占城世次他書並無確據擬刪去二字并酌添以符勾刻

占城傳命給事中黃汝霖行人劉恕封王弟槃羅茶全

為王

臣

章宗瀛按殊域周咨錄天順中命給事江

彤行人劉寅之封槃羅茶全為王與此互異謹附考

占城傳東至海南至真臘

臣

章宗瀛按宋史占城國

東至海西至雲南南至真臘北至驩州其地東西七
百里南北三千里所統大小州三十八與此不同謹

附考

占城傳正德五年沙古卜洛遣叔父沙係把麻入貢

臣章宗瀛按五年為正德紀元傳中遞敘而下脫去

正德二字於義不明謹增入

占城傳命給事中李貫行人劉文瑞往

臣章宗瀛按

劉文瑞為正德辛未進士係廣東新會人占城使還
擢刑科給事舊文誤廷謹據殊域周咨錄及題名錄
改

暹羅傳中牛榮縱家人私市

臣章宗瀛按牛榮與

家人蔣義黃麟私自收買裝至南京又復匿稅為南
刑部尚書趙鑑查追入官蕪木三十九萬九千五百

八十九斤胡椒一萬一千七百四十五斤榮又黃緣
內璫中旨給還原主刑部尚書林俊疏爭乃詔仍舊
入官見嚴從簡周咨錄謹附考

暹羅傳大風子及撒哈刺西洋諸布

臣章宗瀛按周

達觀真臘記大風子乃樹之子本草云以治大風舊
本風誤楓謹據本草綱目及周咨錄改

灰哇傳洪武二年太祖遣使以即位詔諭其國

臣章

宗瀛按洪武二年遣行人吳用顏宗魯詔諭其國見

嚴從簡周咨錄謹附考

爪哇傳前中官尹慶

臣

章宗瀛按蘓門答刺傳中官

尹慶使爪哇成祖時出使中官並無吳慶傳蓋因上
吳賓而誤也謹據改

蘓吉丹傳蘓吉丹爪哇屬國

臣

章宗瀛按蘓吉丹有

王百餘歲能知吉凶見識大錄謹附考

三佛齋傳由是商旋於過

臣

章宗瀛按爪哇既殺使

臣三佛齋亦誘中國他使羈留不遣三佛齋扼諸蕃

咽喉商舶不入其境輒出舟與之戰故其地為商舶所湊而天朝之欲往海外者亦所必經自使臣被羈行者恐誅而道以不通番商遂絕見識大錄謹附考

三佛齊傳成祖以行人譚勝受與道明同邑

臣章宗

瀛按勝受為臨桂縣丞以政最名為監察御史降行人奉使還上以其能稱使擢浙江按察使見周咨錄謹附考

三佛齊傳其上曰詹卑猶國君也

臣章宗瀛按

王號詹卑其人多姓蒲見續文獻通考謹附考

明史卷三百二十四考證

欽定四庫全書

明史卷三百二十五

大學士張廷玉等奉 敕修

列傳第二百一十三

外國六

淳泥

滿刺加

蘇門答刺

須文達那

蘇祿

西洋瑣里

瑣里

覽邦

淡巴

百花

彭亨

一作溫亨
又作彭坑

那孤兒

黎伐

南渤利

阿魯

柔佛

丁機宜

巴喇西

佛郎機

和蘭

淳泥宋太宗時始通中國洪武三年八月命御史張敬

之福建行省都事沈秩往使自泉州航海閱半年抵闍
婆又踰月至其國王馬合謨沙傲慢不為禮秩責之始
丁座拜受詔時其國為蘇祿所侵頗衰耗王辭以貧請
三年後入貢秩曉以大義王既許諾其國素屬闍婆畏
婆人間之王意中沮秩折之曰闍婆久稱臣奉貢爾畏
闍婆反不畏天朝邪乃遣使奉表箋貢鶴頂生玳瑁孔
雀梅花大片龍腦米龍腦西洋布降真諸香八月從敬
之等入朝表用金箋用銀字近回鶻皆鏤之以進帝喜

宴賚甚厚八年命其國山川附祀福建山川之次永樂三年冬其王麻那菴加那遣使入貢乃遣官封為國王賜印誥敕符勘合錦綺綵幣王大悅率妃及弟妹子女陪臣泛海來朝次福建守臣以聞遣中官往宴賚所過州縣皆宴六年八月入都朝見帝獎勞之王跪致詞曰陛下膺天寶命統一萬方臣遠在海島荷蒙天恩賜以封爵自是國中雨暘時順歲屢豐登民無災厲山川之間珍竒畢露草木鳥獸亦悉蕃育國中耆老咸謂此聖

天子覆冒所致臣願睹天日之表少輸悃誠不憚險遠躬率家屬陪臣詣闕獻謝帝慰勞再三命王妃所進中宮箋及方物陳之文華殿王詣殿進獻畢自王及妃以下悉賜冠帶襲衣帝乃饗王於奉天門妃以下饗於他所禮訖送歸會同館禮官請王見親王儀帝令準公侯禮尋賜王儀仗交椅銀器傘扇銷金鞍馬金織文綺紗羅綾絹衣十襲餘賜賚有差十月王卒於館帝哀悼輟朝三日遣官致祭賻以繒帛東宮親王皆遣祭有司具

棺槨明器葬之安德門外石子岡樹碑神道又建祠墓
側有司春秋祀以少牢謚曰恭順賜敕慰其子遐旺命
襲封國王遐旺與其叔父上言臣國歲供瓜哇片腦四
十斤乞敕瓜哇罷歲供歲進天朝臣今歸國乞命護送
就留鎮一年慰國人之望并乞定朝貢期及廉從人數
帝悉從之命三年一貢廉從惟王所遣遂敕瓜哇國免
其歲供王辭歸賜玉帶一金百兩銀三千兩及錢鈔錦
綺紗羅衾褥帳幔器物餘皆有賜以中官張謙行人周

航護行初故王言臣蒙恩賜爵臣境土悉屬職方乞封
國之後山為一方鎮新王復以為言乃封為長寧鎮國
之山御製碑文令謙等勒碑其上其文曰上天佑啓我
國家萬世無疆之基誕命我太祖高皇帝全撫天下休
養生息以治以教仁聲義問薄極照臨四方萬國奔走
臣服充湊於廷神化感動之機其妙如此朕嗣守鴻圖
率由典式嚴恭祇畏協和所統無間內外均視一體遐
邇綏寧亦克承予意乃者淳泥國王誠敬之至知所尊

崇慕尚聲教益謹益虔率其眷屬陪臣不遠數萬里浮
海來朝達其志通其欲稽顙陳辭曰遠方臣妾丕冒天
子之恩以養以息既庶且安思見日月之光故不憚險
遠輒敢造廷又曰覆我者天載我者地使我有土地人
民之奉田疇邑井之聚宮室之居妻妾之樂和味宜服
利用備器以資其生強罔敢侵衆罔敢暴實惟天子之
賜是天子功德所加與天地竝然天仰則見地躋則履
惟天子遠而難見誠有所不通是以遠方臣妾不敢自

外踰歷山海躬詣闕廷以伸其悃朕曰惟天惟皇考付
予以天下子養庶民天與皇考視民同仁予其承天與
皇考之德惟恐弗堪弗若汝言乃又拜手稽首曰自天
子建元之載臣國時和歲豐山川之藏珍寶流溢草木
之無葩薦者皆華而實異禽和鳴走獸踰舞國之黃叟
咸曰中國聖人德化漸暨斯多嘉應臣土雖遠實天子
之氓故奮然而來覲也朕觀其言文貌恭動不踰則悅
喜禮教脫略夷習非超然卓異者不能稽之載籍自古

卷三
過遠之國奉若天道仰服聲教身致帝廷者有之至於
舉妻子兄弟親戚陪臣頓首稱臣妾於階陛之下者惟
淳泥國王一人西南諸蕃國長未有如王賢者王之至
誠貫於金石達於神明而令名傳於悠久可謂有光顯
矣茲特錫封王國中之山為長寧鎮國之山賜文刻石
以著王休於昭萬年其永無數系之詩曰炎海之墟淳
泥所處煦仁漸義有順無迂悽悽賢王惟化之慕導以
象胥適來奔赴同其婦子兄弟陪臣稽顙闕下有言以

陳謂君猶天遺以休樂一視同仁匪偏厚薄顧茲鮮德
弗稱所云浪舶風檣實勞懇勤稽古遠臣順來怒赳以
躬或難矧曰家室王心亶誠金石其堅西南蕃長疇與
王賢蠹蠹高山以鎮王國饒文於石懋昭王德王德克
昭王國攸寧於萬斯年仰我大明八年九月遣使從謙
等入貢謝恩明年復命謙賜其王錦綺紗羅綵絹凡百
二十匹其下皆有賜十年九月遐旺偕其母來朝命禮
官宴之會同館光祿寺旦暮給酒饌明日帝饗之奉天

門王母亦有宴越二日再宴賜王冠帶襲衣王母王叔
父以下分賜有差明年二月辭歸賜金百銀五百鈔三
千錠錢千五百緡錦四綺帛紗羅八十金織文繡文綺
衣各一衾褥幃幔器物咸具自十四年至洪熙元年四
入貢後貢使漸稀嘉靖九年給事中王希文言暹羅占
城琉球爪哇淳泥五國來貢竝道東莞後因私攜賈客
多絕其貢正德間佛郎機闌入流毒聚行屏絕曾未幾
年遽爾議復損威已甚章下都察院請悉遵舊制毋許

混冒萬歷中其王卒無嗣族人爭立國中殺戮幾盡乃立其女為王漳州人張姓者初為其國那督華言尊官也因亂出奔女主立迎還之其女出入王宮得心疾妄言父有反謀女主懼遣人按問其家那督自殺國人為訟寃女主悔絞殺其女授其子官後雖不復朝貢而商人往來不絕國統十四洲在舊港之西自占城四十日可至初屬爪哇後屬暹羅改名大泥華人多流寓其地嘉靖末閩粵海寇遺孽逋逃至此積二千餘人萬歷時

紅毛番強商其境築土庫以居其入澎湖互市者所攜
乃大泥國文也諸風俗物產具詳宋史

滿刺加在占城南順風八日至龍牙門又西行二日即
至或云即古頓遜唐哥羅富沙永樂元年十月遣中官
尹慶使其地賜以織金文綺銷金帳幔諸物其地無王
亦不稱國服屬暹羅歲輸金四十兩為賦慶至宣示威
德及招徠之意其酋拜里迷蘇刺大喜遣使隨慶入朝
貢方物三年九月至京師帝嘉之封為滿刺加國王賜

誥印綵幣襲衣黃蓋復命慶往其使者言王慕義願同
中國列郡歲効職貢請封其山為一國之鎮帝從之製
碑文勒山上末綴以詩曰西南巨海中國通輸天灌地
億載同沐日浴月光景融雨崖露石草木濃金花寶鈿
生青紅有國於此民俗雍王好善義思朝宗願比內郡
依華風出入導從張蓋重儀文謁襲禮虔恭大書貢石
表爾忠爾國西山永鎮封山君海伯翳從皇考陟降
在彼穹後天監視久彌隆爾衆子孫萬福崇慶等再至

其王益喜禮待有加五年九月遣使入貢明年鄭和使其國旋入貢九年其王率妻子陪臣五百四十餘人來朝抵近郊命中官海壽禮部郎中黃裳等宴勞有司供張會同館入朝奉天殿帝親宴之妃以下宴他所光祿日致牲牢上尊賜王金繡龍衣二襲麒麟衣一襲金銀器帷幔衾褥悉具妃以下皆有賜將歸賜王玉帶儀仗鞍馬賜妃冠服瀕行賜宴奉天門再賜玉帶儀仗鞍馬黃金百白金五百鈔四十萬貫錢二千六百貫錦綺紗

羅三百匹帛千匹渾金文綺二金織通袖膝襪二妃及子姪陪臣以下宴賜有差禮官餞於龍江驛復賜宴龍潭驛十年夏其姪入謝及辭歸命中官甘泉偕往旋又入貢十二年王子母幹撒于的兒沙來朝告其父訃即命襲封賜金幣嗣後或連歲或間歲入貢以為常十七年王率妻子陪臣來朝謝恩及辭歸訴暹羅見侵狀帝為賜敕諭暹羅暹羅乃奉詔二十二年西里麻哈刺以父沒嗣位率妻子陪臣來朝宣德六年遣使者來言暹

羅謀侵本國王欲入朝懼為所阻欲奏聞無能書者令臣三人附蘇門答剌貢舟入訴帝命附鄭和舟歸國因令和齎敕諭暹羅責以輯睦鄰封母違朝命初三人至無貢物禮官言例不當賞帝曰遠人越數萬里來懇不平豈可無賜遂賜襲衣綵幣如貢使例八年王率妻子陪臣來朝抵南京天已寒命俟春和北上別遣人齎敕勞賜王及妃洎入朝宴賚如禮及還有司為治舟王復遣其弟貢駝馬方物時英宗已嗣位而王猶在廣東賜

敕獎王命守臣送還國因遣古里真臘等十一國使臣
附載偕還正統十年其使者請賜王息力八密息瓦兒
丟八沙護國敕書及蟒服傘蓋以鎮服國人又言王欲
親詣闕下從人多乞賜一巨舟以使遠涉帝悉從之景
泰六年速魯檀無答佛哪沙貢馬及方物請封為王詔
給事中王暉往已復入貢言所賜冠帶燬於火命製皮
弁服紅羅常服及犀帶紗帽予之天順三年王子蘇丹
芒速沙遣使入貢命給事中陳嘉猷等往封之越二年

禮官言嘉猷等浮海二日至烏猪洋遇颶風舟壞飄六日至清瀾守禦所獲救敕書無失諸賜物悉沾水乞重給令使臣復往從之成化十年給事中陳峻冊封占城王遇安南兵據占城不得入以所齎物至滿剌加諭其王入貢其使者至帝喜賜敕嘉獎十七年九月貢使言成化五年貢使還飄抵安南境多被殺餘黥為奴幼者加宮刑今已據占城地又欲吞本國本國以皆為王臣未敢與戰適安南貢使亦至滿剌加使臣請與廷辯兵

部言事屬既往不足深較帝乃因安南使還敕責其王
并諭滿剌加安南復侵陵即整兵待戰尋遣給事中林
榮行人黃乾亨冊封王子馬哈木沙為王二人溺死贈
官賜祭予廕恤其家餘敕有司海濱招魂祭亦恤其家
復遣給事中張晟行人左輔往晟卒於廣東命守臣擇
一官為輔副以終封事正德三年使臣端亞智等入貢
其通事亞劉本江西萬安人蕭明舉負罪逃入其國賂
大通事王永序班張字謀往淳泥索寶而禮部吏侯永

等亦受賂偽為符印擾郵傳還至廣東明舉與端亞智輩爭言遂與同事彭萬春等劫殺之盡取其財物事覺逮入京明舉凌遲萬春等斬王永減死罰米三百石與張宇侯永竝戍邊尚書白鉞以下皆議罰劉瑾因此罪江西人減其解額五十名仕者不得任京職後佛郎機強舉兵侵奪其地王蘇端媽未出奔遣使告難時世宗嗣位敕責佛郎機令還其古土諭暹羅諸國王以救災恤鄰之義迄無應者滿刺加竟為所滅時佛郎機亦遣

使朝貢請封抵廣東守臣以其國素不列王會羈其使
以聞詔予方物之直遣歸後改名麻六甲云滿剌加所
貢物有瑪瑙珍珠玳瑁珊瑚樹鶴頂金母鶴頂瑣服白
苾布西洋布撒哈刺犀角象牙黑熊黑猿白麕火雞鸚
鵡片腦薔薇露蘇合油梔子花烏爹泥沈香速香金銀
香阿魏之屬有山出泉流為溪土人淘沙取錫煎成塊
日斗錫田瘠少收民皆淘沙捕魚為業氣候朝熱暮寒
男女椎結身體黝黑間有白者唐人種也俗淳厚市道

頗平自為佛郎機所破其風頓殊商舶稀至多直詣蘇門答剌然必取道其國率被邀劫海路幾斷其自販於中國者則直達廣東香山澳接跡不絕云

蘇門答剌在滿剌加之西順風九晝夜可至或言即漢條枝唐波斯大食二國地西洋要會也成祖初遣使以即位詔諭其國永樂二年遣副使聞良輔行人寧善賜其酋織金文綺絨錦紗羅招徠之中官尹慶使爪哇便道復使其國三年鄭和下西洋復有賜和未至其酋宰

奴里阿必丁已遣使隨慶入朝貢方物詔封為蘇門答
刺國王賜印誥綵幣襲衣遂比年入貢終成祖世不絕
鄭和凡三使其國先是其王之父與鄰國花面王戰中
矢死王子年幼王妻號於衆曰孰能為我報讐者我以
為夫與共國事有漁翁聞之率國人往擊馘其王而還
王妻遂與之合稱為老王既而王子年長潛與部領謀
殺老王而襲其位老王子蘇幹刺逃山中連年率衆侵
擾十三年和復至其國蘇幹刺以頒賜不及已怒統數

萬人邀擊和勒步卒及國人禦之大破賊衆追至南渤
利國俘以歸其王遣使入謝宣德元年遣使入賀五年
帝以外蕃貢使多不至遣和及王景弘遍歷諸國頒昭
曰朕恭膺天命祇承太祖高皇帝太宗文皇帝仁宗昭
皇帝大統君臨萬邦體祖宗之至仁普輯寧於庶類已
大赦天下紀元宣德爾諸蕃國遠在海外未有聞知茲
遣太監鄭和王景弘等齎詔往諭其各敬天道撫人民
共享太平之福凡歷二十餘國蘇門答刺與焉明年遣

使入貢者再八年貢麟麟九年王弟哈利之漢來朝卒
於京帝憫之贈鴻臚少卿賜誥有司治喪葬置守塚戶
時景弘再使其國王遣弟哈尼者罕隨入朝明年至言
王老不能治事請傳位於子乃封其子阿卜賽亦的為
國王自是貢使漸稀成化二十二年其使者至廣東有
司驗無印信勘合乃藏其表於庫却還其使別遣番人
輸貢物京師稍有給賜自後貢使不至迨萬厯間國兩
易姓其時為王者人奴也奴之主為國大臣握兵柄奴

桀黠主使牧象象肥俾監魚稅日以大魚奉其主主大
喜俾給事左右一日隨主入朝見王尊嚴若神主鞠躬
惟謹出謂主曰主何恭之甚主曰彼王也焉敢抗曰主
第不欲王爾欲之主即王矣主詫叱退之他日又進曰
王左右侍衛少主擁重兵出鎮必入辭請以奴從主言
有機事乞屏左右王必不疑奴乘間刺殺之奉主為王
猶反掌耳主從之奴果殺王大呼曰王不道吾殺之吾
主即王矣敢異議者齒此刃衆懾服不敢動其主遂篡

位任奴為心腹委以兵柄未幾奴復殺主而代之乃大
為防衛拓其宮建六門不得闢入雖勲貴不得帶刀上
殿出乘象象駕亭而帷其外如是者百餘俾人莫測王
所在其國俗頗淳出言柔媚惟王好殺歲殺十餘人取
其血浴身謂可除疾貢物有寶石瑪瑙水晶石青回回
青善馬犀牛龍涎香沈香速香木香丁香降真香刀弓
錫鎖服胡椒蘇木硫黃之屬貨舶至貿易稱平地本瘠
無麥有禾禾一歲二稔四方商賈輻輳華人往者以地

遠價高獲利倍他國其氣候朝如夏暮如秋夏有瘴氣
婦人裸體惟腰圍一布其他風俗類滿剌加篡弒後易
國名曰啞齊

須文達那洪武十六年國王殊旦麻勒兀達盼遣使俺
八兒來朝貢馬二匹幼苾布十五匹隔著布入的力布
各二匹花滿直地二番縣紬直地二兜羅絲二斤撒刺
八二箇幼賴革著一箇撒哈刺一箇及薔薇水沈香降
香速香諸佛命賜王大統歷綺羅寶鈔使臣襲衣或言

須文達那即蘇門答剌洪武時所更然其貢物與王之
名皆不同無可考

蘇祿地近淳泥闍婆洪武初發兵侵淳泥大獲以闍婆
援兵至乃還永樂十五年其國東王巴都葛叭哈剌西
王麻哈剌叱葛剌麻丁峒王妻叭都葛巴剌卜竝率其
家屬頭目凡三百四十餘人浮海朝貢進金鏤表文獻
珍珠寶石玳瑁諸物禮之若滿剌加尋竝封為國王賜
印誥襲衣冠帶及鞍馬儀仗器物其從者亦賜冠帶有

差居二十七日三王辭歸各賜玉帶一黃金百白金二千羅錦文綺二百帛三百鈔萬錠錢二千緡金繡蟒龍麒麟衣各一東王次德州卒於館帝遣官賜祭命有司營葬勒碑墓道謚曰恭定留妻妾僉從十人守墓俟畢三年喪遣歸乃遣使齋教諭其長子都馬舍曰爾父知尊中國躬率家屬陪臣遠涉海道萬里來朝朕眷其誠惻已錫王封優加賜賚遣官護歸舟次德州遭疾殞歿朕聞之深為哀悼已葬祭如禮爾以嫡長為國人所屬

宜即繼承用綏藩服今特封爾為蘇祿國東王爾尚益
篤忠貞敬承天道以副眷懷以繼爾父之志欽哉十八
年西王遣使入貢十九年東王母遣王叔叭都加蘇里
來朝貢大珠一其重七兩有奇二十一年東王妃還國
厚賜遣之明年入貢自後不復至萬厯時佛郎機屢攻
之城據山險迄不能下其國於古無所考地瘠寡粟麥
民率食魚蝦煮海為鹽釀蔗為酒織竹為布氣候常熱
有珠池夜望之光浮水面土人以珠與華人市易大者

利數十倍商舶將返輒留數人為質冀其再來其旁近國名高藥出玳瑁

西洋瑣里洪武二年命使臣劉叔勉以即位詔諭其國三年平定沙漠復遣使臣頒詔其王別里提遣使奉金葉表從叔勉獻方物賜文綺紗羅諸物甚厚并賜大統歷成祖頒即位詔於海外諸國西洋亦與焉永樂元年命副使聞良輔行人甯善使其國賜絨錦文綺紗羅已復命中官馬彬往使賜如前其王即遣使來貢附載胡

椒與民市有司請徵稅命勿徵二十一年偕庫哩阿爾丹等十五國來貢

瑣里近西洋瑣里而差小洪武三年命使臣達哈特穆爾齋詔撫諭其國五年王卜納的遣使奉表朝貢并獻其國土地山川圖帝顧中書省臣曰西洋諸國素稱遠蕃涉海而來難計歲月其朝貢無論疏數厚往薄來可也乃賜大統歷及金織文綺紗羅各四匹使者亦賜幣帛有差

覽邦在西南海中洪武九年王昔里馬哈剌札的剌札遣使奉表來貢詔賜其王織金文綺紗羅使者宴賜如制永樂宣德中嘗附鄰國朝貢其地多沙磧麻麥之外無他種高賈鮮至山坦迤無峯巒水亦淺濁俗好佛勤賽祀厥貢孔雀馬檀香降香胡椒蘇木交易用錢

淡巴亦西南海中國洪武十年其王佛喝思羅遣使上表貢方物賜賚有差其國石城瓦屋王乘輿官跨官有中國威儀土衍水清草木暢茂畜產甚夥男女勤於耕

織市有貿易野無寇盜稱樂土焉厥貢苾布兜羅絛被
沈香速香檀香胡椒

百花居西南海中洪武十一年其王刺丁刺者望沙遣
使奉金葉表貢白鹿紅猴龜筒玳瑁孔雀鸚鵡哇哇倒
掛鳥及胡椒香蠟諸物詔賜王及使者綺幣襲衣有差
國中氣候恒燠無霜雪多奇花異卉故名百花民富饒
尚釋教

彭亨在暹羅之西洪武十一年其王麻哈刺惹答饒遣

使齋金葉表貢番奴六人及方物宴賚如禮永樂九年
王已刺密瑣刺達羅息泥遣使入貢十年鄭和使其國
十二年復入貢十四年與古里瓜哇諸國偕貢復令鄭
和報之其國土田沃氣候常溫米粟饒足煮海為鹽釀
椰漿為酒上下親狎無寇賊然惑於鬼神刻香木為像
殺人祭賽以禳災祈福所貢有象牙片腦乳香速香檀
香胡椒蘇木之屬至萬厯時有柔佛國副王子娶彭亨
王女將婚副王送子至彭亨彭亨王置酒親戚畢會婆

羅國王子為彭亨王妹壻舉觴獻副王而手指有巨珠甚美副王欲之許以重賄王子靳不予副王怒即歸國發兵來攻彭亨人出不意不戰自潰王與婆羅王子奔金山淳泥國王王妃兄也聞之率衆來援副王乃大肆焚掠而去當是時國中鬼哭三日人民半死淳泥王迎其妹歸彭亨王隨之而命其長子攝國已王復位次子素凶悍遂毒殺其父弑其兄自立

那孤兒在蘇門答刺之西壤相接地狹止千餘家男子

皆以墨副面為花獸之狀故又名花面國獠頭裸體男
女止單布圍腰然俗淳田足稻禾強不侵弱富不驕貧
悉自耕而食無寇盜永樂中鄭和使其國其酋長常入
貢方物

黎伐在那孤兒之西南大山北大海西接南渤利居民
三千家推一人為主隸蘇門答刺聲音風俗多與之同
永樂中嘗隨其使臣入貢

南渤利在蘇門答刺之西順風三日夜可至王及居民

皆回回人僅千餘家俗朴實地少穀人多食魚蝦西北
海中有山甚高大曰帽山其西復大海名那沒黎洋西
來洋船俱望此山為準近山淺水內生珊瑚樹高者三
尺許永樂十年其王馬哈麻沙遣使附蘇門答刺使入
貢賜其使襲衣賜王印誥錦綺羅紗綵幣遣鄭和撫諭
其國終成祖時比年入貢其王子沙者罕亦遣使入貢
宣德五年鄭和遍賜諸國南渤利亦與焉

阿魯一名啞魯近滿刺加順風三日夜可達風俗氣候

大類蘇門答剌田瘠少收盛藝芭蕉椰子為食男女皆裸體以布圍腰永樂九年王速魯唐忽先遣使附古里諸國入貢賜其使冠帶綵幣寶鈔其王亦有賜十年鄭和使其國十七年王子段阿剌沙遣使入貢十九年二十一年再入貢宣德五年鄭和使諸蕃亦有賜其後貢使不至

柔佛近彭亨一名烏丁礁林永樂中鄭和遍歷西洋無柔佛名或言和曾經東西竺山今此山正在其地疑即

東西竺萬歷間其酋好構兵鄰國丁機宜彭亨屢被其
患華人販他國者多就之貿易時或邀至其國國中覆
茅為屋列木為城環以池無事通商於外有事則召募
為兵稱強國焉地不產穀常易米於鄰壤男子薙髮徒
跣佩刀女子蓄髮椎結其酋則佩雙刀字用茭葦葉以
刀刺之婚姻亦論門閥王用金銀為食器羣下則用磁
無七筓俗好持齋見星方食節序以四月為歲首居喪
婦人薙髮男子則重薙死者皆火葬所產有犀象玳瑁

片腦沒藥血竭錫蠟嘉文簞木棉花檳榔海菜窩燕西
國米荃吉柿之屬始其國吉寧仁為大庫忠於王為王
所倚信王弟以兄疏已潛殺之後出行墮馬死左右咸
見吉寧仁為祟自是家家祀之

丁機宜瓜哇屬國也幅員甚狹僅千餘家柔佛黠而雄
丁機宜與接壤時被其患後以厚幣求婚稍獲寧處其
國以木為城酋所居旁列鐘鼓樓出入乘象以十月為
歲首性好潔酋所食啖皆躬自割烹民俗類瓜哇物產

悉知柔佛酒禁甚嚴有常稅然大家皆不飲維細民無籍者飲之其曹偶咸非笑婚者男往女家持其門戶故生女勝男喪用火葬華人往商交易甚平自為柔佛所破往者亦鮮

巴喇西去中國絕遠正德六年遣使臣沙地白入貢言其國在南海始奉王命來朝舟行四年半遭風飄至西瀾海舟壞止存一小艇又飄流八日至得吉零國居一年至祕得居八月乃遵陸行閱二十六日抵暹羅以情

告王獲賜日給且賜婦女四人居四年迄今年五月始附番舶入廣東得達闕下進金葉表貢祖母綠一珊瑚樹琉璃瓶玻璃盞各四及瑪瑙珠胡黑丹諸物帝嘉其遠來賜賚有加

佛郎機近滿剌加正德中據滿剌加地逐其王十三年遣使臣加必丹末等貢方物請封始知其名詔給方物之直遣還其人久留不去剽劫行旅至掠小兒為食已而黃緣鎮守中官許入京武宗南巡其使火者亞三因

江彬侍帝左右帝時學其語以為戲其留懷遠驛者益掠買良民築室立寨為久居計十五年御史邱道隆言滿剌加乃剌封之國而佛郎機敢併之且咱我以利邀求封貢決不可許宜却其使臣明示順逆令還滿剌加疆土方許朝貢倘執迷不悛必檄告諸蕃聲罪致討御史何鰲言佛郎機最凶狡兵械較諸蕃獨精前歲駕大舶突入廣東會城礮聲殷地留驛者違制交通入都者桀驁爭長今聽其往來貿易勢必爭鬪殺傷南方之禍

殆無紀極祖宗朝貢有定期防有常制故來者不多近因布政使吳廷舉謂缺上供香物不問何年來取貨致番舶不絕於海滙蠻人雜遯於州城禁防既疏水道益熟此佛郎機所以乘機突至也乞悉驅在澳番舶及番人潛居者禁私通嚴守備庶一方獲安疏下禮部言道隆先宰順德鰲即順德人故深晰利害宜俟滿剌加使臣至廷詰佛郎機侵奪鄰邦擾亂內地之罪奏請處置其他悉如御史言報可亞三侍帝驕甚從駕入都居會

同館見提督主事梁焯不屈滕焯怒撻之彬大詬曰彼嘗與天子嬉戲肯跪汝小官邪明年武宗崩亞三下吏自言本華人為番人所使乃伏法絕其朝貢其年七月又以接濟朝使為詞攜土物求市守臣請抽分如故事詔復拒之其將別都盧既以巨礮利兵肆掠滿剌加諸國橫行海上復率其屬疎世利等駕五舟擊破巴西國嘉靖二年遂寇新會之西草灣指揮柯榮百戶王應恩禦之轉戰至稍州向化人潘丁苟先登衆齊進生禽別

都盧疎世利等四十二人斬首三十五級獲其二舟餘賊復率三舟接戰應恩陣亡賊亦敗遁官軍得其礮即名為佛郎機副使汪鉉進之朝九年秋鉉累官右都御史上言今塞上墩臺城堡未嘗不設乃寇來輒遭蹂躪者蓋墩臺止瞭望城堡又無制遠之具故往往受困當用臣所進佛郎機其小止二十斤以下遠可六百步者則用之墩臺每墩用其一以三人守之其大至七十斤以上遠可五六里者則用之城堡每堡用其三以十人

守之五里一墩十里一堡大小相依遠近相應寇將無所容足可坐收不戰之功帝悅即從之火礮之有佛郎機自此始然將士不善用迄莫能制寇也初廣東文武官月俸多以番貨代至是貨至者寡有議復許佛郎機通市者給事中王希文力爭乃定令諸番貢不以時及勘合差失者悉行禁止由是番舶幾絕巡撫林富上言粵中公私諸費多資商稅番舶不至則公私皆窘今許佛郎機互市有四利祖宗時諸番常貢外原有抽分之

法稍取其餘足供御用利一兩粵比歲用兵庫藏耗竭
藉以充軍餉備不虞利二粵西素仰給粵東小有徵發
即措辦不前若番舶流通則上下交濟利三小民以懋
遷為生持一錢之貨即得展轉販易衣食其中利四助
國裕民兩有所賴此因民之利而利之非開利孔為民
梯禍也從之自是佛郎機得入香山澳為市而其徒又
越境商於福建往來不絕至二十六年朱統為巡撫嚴
禁通番其人無所獲利則整衆犯漳泉之月港浯嶼副

使柯喬等禦却之二十八年又犯詔安官軍迎擊於走
馬溪生禽賊首李光頭等九十六人餘遁去統用便宜
斬之怨統者御史陳九德遂劾其專擅帝遣給事中杜
汝楨往驗言此滿刺加商人歲招海濱無賴之徒往來
鬻販無僭號流劫事統擅自行誅誠如御史所劾統遂
被逮自殺蓋不知滿刺加即佛郎機也自統死海禁復
弛佛郎機遂縱橫海上無所忌而其市香山灣壕鏡者
至築室建城雄踞海畔若一國然將吏不肖者反視為

外府矣壕鏡在香山縣南虎跳門外先是暹羅占城爪哇琉球淳泥諸國互市俱在廣州設市舶司領之正德時移於高州之電白縣嘉靖十四年指揮黃慶納賄請於上官移之壕鏡歲輸課二萬金佛郎機遂得混入高棟飛甍櫺比相望閩粵商人趨之若鶩久之其來益衆諸國人畏而避之遂專為所據四十四年偽稱滿刺加入貢已改稱蒲都麗家守臣以聞下部議言必佛郎機假託乃却之萬歷中破滅呂宋盡擅閩粵海上之利勢

益熾至三十四年又於隔水青州建寺高六七丈閼敞
奇閼非中國所有知縣張大猷請毀其高墉不果明年
番禺舉人盧廷龍會試入都請盡逐澳中諸番出居浪
白外海還我壕鏡故地當事不能用番人既築城聚海
外雜番廣通貿易至萬餘人吏其土者皆畏懼莫敢詰
甚有利其實貨佯禁而陰許之者總督戴耀在事十三
年養成其患悉人又潛匿倭賊敵殺官軍四十二年總
督張鳴岡檄番人驅倭出海因上言粵之有澳夷猶疽

之在背也澳之有倭賊猶虎之傳翼也今一旦驅斥不費一矢此聖天子威德所致惟是倭去而番尚存有謂宜勦除者有謂宜移之浪白外洋就船貿易者顧兵難輕動而壕鏡在香山內地官軍環海而守彼日食所需咸仰於我一懷異志我即制其死命若移之外洋則巨海茫茫奸宄安詰制禦安施似不如申明約束內不許一奸闌出外不許一倭闌入無啟釁無弛防相安無患之為愈也部議從之居三年設參將於中路雍陌營調

千人戍之防禦漸密天啟元年守臣慮其終為遣遣監
司馮從龍等毀其所築青州城番亦不敢拒其時大西
洋人來中國亦居此澳蓋番人本求市易初無不軌謀
中朝疑之過甚迄不許其朝貢又無力以制之故議者
紛然然終明之世此番固未嘗為變也其人長身高鼻
貓睛鷹嘴赤髮赤鬚好經商恃強陵轢諸國無所不往
後又稱干系臘國所產多犀象珠貝衣服華潔貴者冠
賤者笠見尊長輒去之初奉佛教後奉天主教市易但

伸指示數雖累千金不立約契有事指天為誓不相負
自滅滿刺加巴西呂宋三國海外諸蕃無敢與抗者
和蘭又名紅毛番地近佛郎機永樂宣德時鄭和七下
西洋歷諸番數十國無所謂和蘭者其人深目長鼻髮
眉鬚皆赤足長尺二寸頰偉倍常萬歷中福建商人歲
給引往販大泥呂宋及咬啣吧者和蘭人就諸國轉販
未敢窺中國也自佛郎機市香山據呂宋和蘭聞而慕
之二十九年駕大艦攜巨礮直薄呂宋呂宋人力拒之

則轉薄香山澳澳中人數詰問言欲通貢市不敢為寃
當事難之稅使李道即召其酋入城遊處一月不敢聞
於朝乃遣還澳中人慮其登陸謹防禦始引去海澄人
李錦及奸商潘秀郭震久居大泥與和蘭人習語及中
國事錦曰若欲通貢市無若漳州者漳南有澎湖嶼去
海遠誠奪而守之貢市不難成也其酋麻韋郎曰守臣
不許奈何曰稅使高寀嗜金銀甚若厚賄之彼特疏上
聞天子必報可守臣敢抗旨哉酋曰善錦乃代為大泥

國王書一移宋一移兵備副使一移守將俾秀震齎以
來守將陶拱聖大駭亟白當事繫秀於獄震遂不敢入
初秀與酋約入閩有成議當遣舟相聞而酋卞急不能
待卽駕二大艦直抵澎湖時三十二年之七月汛兵已
撤如入無人之墟遂伐木築舍爲久居計錦亦潛入漳
州偵探詭言被獲逃還當事已廉知其狀并繫獄已而
議遣二人諭其酋還國許以自贖且拘震與俱三人既
與酋成約不欲自彰其失第云我國尚依違未定而當

事所遣將校詹獻忠齎檄往諭者乃多攜幣帛食物覲其厚酬海濱人又潛載貨物往市首益觀望不肯去當事屢遣使諭之見首語輒不競愈為所慢而案已遣心腹周之範詣首說以三萬金餽案即許貢市首喜與之盟已就矣會總兵施德政令都司沈有容將兵往諭有容負膽智大聲論說首心折乃曰我從不聞此言其下人露刃相詰有容無所懾盛氣與辨首乃悔悟令之範還所贈金止以哆囉噠玻璃器及番刀番酒餽案乞代

奏通市案不敢應而撫按嚴禁奸民下海犯者必誅由是接濟路窮番人無所得食十月末揚帆去巡撫徐學聚劾秀錦等罪論死遣戍有差然是時佛郎機橫海上紅毛與爭雄復汎舟東來攻破美洛居國與佛郎機分地而守後又侵奪臺灣地築室耕田久留不去海上奸民闌出貨物與市已又出據澎湖築城設守漸為求市計守臣懼禍說以毀城遠徙即許互市番人從之天啟三年果毀其城移舟去巡撫商周祚以遵諭遠徙上聞

然其據臺灣自若也已而互市不成番人怨復築城澎湖掠漁舟六百餘艘俾華人運土石助築尋犯廈門官軍禦之俘斬數十人乃詭詞求款再許毀城遠徙而修築如故已又泊舟風櫃仔出沒浯嶼白坑東椗莆頭古雷洪嶼沙洲甲洲間要求互市而海寇李旦復助之濱海郡邑為戒嚴其年巡撫南居益初至謀討之上言臣入境以來聞番船五艘續至與風櫃仔船合凡十有一艘其勢愈熾有小校陳士瑛者先遣往咬啣吧宣諭其

王至三角嶼遇紅毛船言咬啣吧王已往阿南國因與士瑛偕至大泥謁其王王言咬啣吧國主已大集戰艦議往澎湖求互市若不見許必至構兵蓋阿南即紅毛番國而咬啣吧大泥與之合謀必不可以理諭為今日計非用兵不可因列上調兵足餉方略部議從之四年正月遣將先奪鎮海港而城之且築且戰番人乃退守風櫃城居益增兵往助攻擊數月寇猶不退乃大發兵諸軍齊進寇勢窘兩遣使求緩兵容運米入舟即退去

諸將以窮寇莫追許之遂揚帆去獨渠帥高文律等十
二人據高樓自守諸將破禽之獻俘於朝澎湖之警以
息而其據臺灣者猶自若也崇禎中為鄭芝龍所破不
敢窺內地者數年乃與香山佛郎機通好私貿外洋十
年駕四舶由虎跳門薄廣州聲言求市其酋招搖市上
奸民視之若金穴蓋大姓有為之主者當道鑒壞鏡事
議驅斥或從中撓之會總督張鏡心初至力持不可乃
遁去已為奸民李葉榮所誘交通總兵陳謙為居停出

入事露葉榮下吏謙自請調用以避禍為兵科淩義渠等所劾坐逮訊自是奸民知事終不成不復敢勾引而番人猶據臺灣自若其本國在西洋者去中華絕遠華人未嘗至十所特惟巨舟大礮舟長三十丈廣六丈厚二尺餘樹五桅後為三層樓旁設小牕置銅礮桅下置二丈巨鐵礮發之可洞裂石城震數十里世所稱紅夷礮即其製也然以舟大難轉或遇淺沙即不能動而其人不善戰故往往挫衄其所役使名烏鬼入水不沈

走海面若平地其柁後置照海鏡大徑數尺能照數百
里其人悉奉天主敎所產有金銀琥珀瑪瑙玻璃天鵝
絨瑣服哆囉噠國土既富遇中國貨物當意者不惜厚
資故華人樂與為市

明史卷三百二十五

欽定四庫全書

明史卷三百二十五考證

淳泥傳福建行省都事沈秩往使

臣章宗瀛按淳泥

以金佩刀吉貝布贈秩秩辭之王曰中國使廉潔乃如是耶閭婆人來討索每無厭況強之而不受耶見周咨錄謹附考

淳泥傳自占城四十日可至

臣章宗瀛按淳泥宋史

言其去三佛齊四十日程去占城與摩逸各三十日

程此言去占城四十日程與宋史異謹識

滿刺加傳鶴頂瑣服

臣章宗瀛按瑣服以鳥毳為之

紋如紈綺周容錄作瑣袂謹附考

蘓門答刺傳老王子蘓幹刺逃山中

臣章宗瀛按老

王弟蘓幹刺獻徵錄續文獻通考識大錄並作漁翁

子鄭和傳亦云前偽王子傳作弟誤謹據改

蘓門答刺傳其使者至廣東有司驗無印信勘合

臣

章宗瀛按成化二十二年番人馬力麻為海商詭稱

蘓門答刺使臣私通販易廣東市舶中官韋眷利其
貨不究治之為左布政陳選所發以奸抵罪則本非
蘓答刺所使不徒無印信勘合也與陳選傳互異謹附
識

南渤利傳南渤利在蘓門答刺之西

臣章宗瀛按南

渤利續文獻通考作南渤里吾學編作南泥里又云
或言即南平里諸書互異謹識

佛郎機傳其人無所獲則整衆犯漳泉之月港浯嶼

臣章宗瀛按統志月港為漳州所轄浯嶼為泉州所轄兵志並同傳作漳州誤謹據改

和蘭傳即駕二大艦直抵澎湖時三十二年之七月

臣章宗瀛按元末於澎湖置巡司明洪武二十年盡徙其民廢巡司而墟其地嘉靖中為海寇曾一本所據以萬厯二十年倭犯朝鮮增設戍兵未幾即廢而統志載紅毛闖入之時乃在三十七年與此稍異謹附考